

Incumbensa Rettich concernent la creaziun d'ina basa legala en cas da stalking

Il stalking è sa sviluppà vinavant ils ultims onns. Cun las novas pussaivladads tecnicas sco er pervia da la mobilitad ch'è ozendi bler pli gronda, è er creschida la multifariadad dal stalking.

Da definir il stalking n'è betg uschè simpel, perquai ch'i sa tracta d'in cumportament ch'è fitg datiers ad auters causals sco la violenza u la smanatscha a chasa. Tuttina datti cleras caracteristicas per definir il stalking.

Uschia capita il stalking per regla durant ina perioda pli lunga e sa mussa tras mulestas per telefon, per e-mail u per messadis. Er po il stalking sa manifestar tras perseguitar, guettar e suandar ina persuna a la piazza da lavur, en il temp liber u davant l'abitaziun. Er il spiunar e mulestar persunas vischinas, parentas ed enconuschentas tutga latiers. Senza ina intervenziun ad ura exista la ristga ch'il stalking sa midia en moda fluctuanta a smanatschas u schizunt ad acts da violenza.

Dapi in detg temp s'occupan ins en Svizra sin plaun politic dal tema stalking. Differents chantuns sco Berna, ils dus Appenzells, Zug, Uri, Neuchâtel e.u.v. han previs mesiras spezialas cunter il stalking ed èn uschia sa rendids abels d'agir. Il rapport spezial dal Departament federal da l'intern (DFI) davart violenza cuntogna la suandanta frasa:

«Sche la polizia agescha ad ura ed en moda offensiva, è quai en cas da stalking savens fitg impurtant per survegnir il stalking uschè svelt sco pussaivel sut controlla resp. per metter ina fin a tal.»

Perquai ch'il causal manca, na datti en il chantun Grischun fin ussa naginas cifras en il sector dal stalking. Il maximum da las cussegliaziuns tar l'Agid a victimas dal Grischun lascha dentant presumar ch'il dumber da persunas pertutgadas da stalking crescha er en il Grischun.

En Svizra vegn applitgà in model da 3 fasas per proteger persunas pertutgadas da stalking en moda immediata, cuntinuanta e persistenta.

Quel lavura cun intervenziuns immediatas, pia cun mesiras per intervegnir immediatamain cunter la persuna che fa stalking, per pudair interromper uschè svelt sco pussaivel l'autodinamica (l'uschenumnada spirala da stalking), cun ina fasa da stabilisaziun, pia cun mesiras per prevegnir a repetiziuns ed ad in auter agir suenter il fatg ed uschia per stabilisar la situaziun resp. per mantegnair resp. per cuntinuar cun mesiras immediatas efficacias, sco er cun soluziuns persistentas, pia cun mesiras per mantegnair ina protecziun a media ed a lunga vista cunter ulteriuras acziuns da stalking.

Per pudair applitgar quest model ch'è sa cumprovà en differents chantuns, dovri ina basa legala. Bliers chantuns disponan gia d'ina basa dal gener, en il Grischun però manca ina tala fin ussa.

Per insumma pudair proteger persunas ch'èn pertutgadas da stalking, sto il Cussegl grond stgaffir ina basa legala.

Per serrar questa largia en nossa legislaziun, pretendan las sutsegnadras ed ils sutsegnaders ch'ina basa legala per il causal dal «stalking» vegnia stgaffida analogamain als chantuns numnads qua survart.

Cuira, ils 22 d'october 2020

Rettich, Geisseler, Casty, Baselgia-Brunner, Bettinaglio, Cahenzli-Philipp, Cantieni, Caviezel (Cuira), Gartmann-Albin, Hofmann, Hohl, Holzinger-Loretz, Müller (Favugn), Niggli-Mathis (Grüsch), Perl, Preisig, Rutishauser, Schwärzel, Thür-Suter, Ulber, von Ballmoos, Widmer (Favugn), Widmer-Spreiter (Cuira), Wilhelm, Zanetti (Landquart), Brändli Capaul, Bürgi-Büchel, Pajic, Spadarotto, Tomaschett (Cuira), Tscholl